

**Naalackersuisut kingusinnerpaamik UKA 2018-mut ileqqussaasunik  
siunnersuisooqatigiinnik pilersitsinissamat siunnersuusioqqullugu Inatsisartut  
aalajangiiffigisassaattut siunnersuut**

(Inatsisartunut ilaasortaq Bendt B. Kristiansen, Inuit Ataqtigiit)

**Akissuteqaat**

(Peqqissutsimut Nunanilu Avannarlerni Suleqatigiinnermut Naalackersuisoq)

**Siullermeerneqarnera**

Nunatsinni ileqqussaasunik siunnersuisooqatigiinnik pilersitsisoqarnissaanik siunnersuummut Naalackersuisut qujapput.

Maannamut assigiinngitsunik siunnersuisooqatigiinnik peqatigiiffinnillu siunnersuummut attuumassuteqartunik suliaqartartunik peqarpoq. Assersuutigalugu Inuit Pisinnaatitaaffiinut Kalaallit Nunaata Siunnersuisooqatigiivi 15-inik ilaasortalik nakkutilliisulillu inuit pisinnaatitaaffii pillugit paasissutissanik, oqallitsitsinermik nunatsinnilu inuit pisinnaatitaaffiinik unioqqutitsisoqarneranik nakkutilliinermik suliaqartarput. Allat tassaapput Meeqqat pillugit Siunnersuisooqatigiit, arfineq-marlunnik ilaasortalik Meeqqallu Illersuisuannik aalajangersimasumik siulittaasulik. Siunnersuisooqatigiit ataatsimut meeqqat ineriartornerat, atuarnerat, kulturiat, sunngiffimmi sammisartagaat, peqqissusaat, inatsisitigut inissisimanerat meeqqallu immikkut ittunik pisariaqartitallit pillugit ilisimasaqarluarput. Tamatuma saniatigut aamma Naligiissitaanissamat Siunnersuisooqatigeearpoq nunatsinni inuiaqatigiit akornanni angutit arnallu naligiissitaanissaannik siuarsaanermik suliaqartartumik. Peqqinnissaqarfiup peqqinnissarlu pillugu ilisimatusarnerup iluani nunatsinni peqqinnissakkut suliniutini ilisimatusarnermi ileqqorissaartoqarneranik nalilersuinisaaq siunertaralugu ilisimatusarnermi ileqqorissaarnissamat Ataatsimiititaliaq pilersinneqarpoq.

Siunnersuummi ileqqussaasunik siunnersuisooqatigiit pisortatut oqartussaasunik siunnersuisuunissaat kiisalu peqqissutsimut inuiaqatigiinnillu tunngatillugu ileqqorissaarnermut tunngasutigut ajornartorsiutit eqqarsaatigalugit inuiaqatigiinni oqallisitsisuunissaat pingartinneqarpoq.

Ileqqussaasunik siunnersuisooqatigiit inuiaqatigiinni assigiinngitsut oqallisigineqartariaqartunik siunnersuisooqatigiinnilu allani sammineqarnek ajortunik eqqummaaritsitsilersinnaanera Naalackersuisut isumaqatigaat. Assersuutigalugu inuit peruluttut anniarneri millisinniarlugit nakorsaaneq imaluunniit inuiaqatigiinni paqumigineqartut ileqqunut ilitsoqqussanullu tunngassuteqartut eqqumaffigineqaleqqullugit suliaqarsinnaavoq.

Naalackersuisut erseqqissaatigerusuppaat aalajangiiffigisassatut siunnersuut nassiunneqartoq akuersissutigineqarpat siunnersuisooqatigiit politikkimut attuumassuteqannginnissaata

pingaaruteqarnera. Taamaattumik siunnersuisooqatigiit qanoq katiterneqarnera, sumut inissinneqarnera qanorlu aaqqissornera pingaaruteqarluinnarput.

Tamanna tunuliaqutaralugu Naalackersuisut inassuteqaatigaat ileqqussaasunik siunnersuisooqatigiit pilersinneqarnissaannik aalajangiiffigineqartussatut siunnersuut saqqummiunneqartoq Inatsisartunit taparserneqassasoq. Taparserneqassappat Naalackersuisut inatsisitigut piareersaatitut suliaqarnissamut, tassunga ilanngullugu soqutigisaqatigiit tamarmik suliaqarnermi tusarneqarnissaannik qulakkeerinninnissaq, qilanaarput.